

清

史

稿

清史稿

列傳二百四十

榮全

善縣

升泰

善慶

柏縣

恩澤

銘安

恭鐙

慶裕

長庚

文海

鳳全

增祺

貽穀

信陽

榮全關佳氏滿洲正黃旗人一等威勇侯那銘嗣子咸豐元年襲爵授二等侍衛從征山東以功遷頭等還直乾清門十一年出爲塔爾巴哈臺領隊大臣歷喀喇沙爾辦事大臣伊犁參贊大臣同治五年以鑲紅旗蒙古副都統署伊犁將軍明年調烏里雅蘇臺參贊大臣時纏回襲陷伊犁俄乘機遣兵入藉口代爲收復榮全內籌守禦外示羈縻又以索倫蒙古被兵民多亡入俄境爲請擇地安插分部護之八年朝旨以新疆各城多與俄接壤命榮全會俄官依三年

勘辦西北記約建設烏屬界牌鄂博先是塔城和約兩國分界自恰克圖西北踰烏梁海首沙濱達巴哈訖浩罕邊界繪畫地圖識以紅綫至是集議烏克卡倫仍依舊界惟自東北沙濱達巴哈至西南賽留格木山柏郭蘇克壩補牌博八明定界限所謂烏里雅蘇臺界約是也九年坐烏魯木齊城陷褫職留任十年俄遣柯福滿將軍占領庫爾札聲收烏魯木齊詔榮全赴伊犁收回城池榮全遂自烏城西進至霍博克賽里直抵塔爾巴哈臺會天大雪止舍踰歲與俄官布呼策勒傅斯奇集議色爾賀鄂魯勒榮全向之索還俄官陽言請命本國而陰遣兵襲取瑪納斯駸駸欲東犯榮全不獲已返塔城是時俄人據伊犁可千餘人滋驕橫索倫錫伯苦之十二年錫伯窘益甚榮全濟以銀俄官反出阻之榮全曰爲我屬地我自濟之與俄奚涉焉牒駸之俄官詞屈上聞而嘉之會回排安集延擾動上命榮全進攻瑪納斯綴寇勢遂復其官十三年白彥虎犯上馬橋榮全遣軍敗之沙子山光緒二年師克瑪納斯南北二城榮全數有功尋召入京歷兼護軍統領右翼前鋒統領五年卒恤如制喜昌字桂亭葛濟

勒氏滿洲鑲白旗人世居吉林亦以防俄著初從軍征拉果功至協領河內之役以少勝衆功尤盛晉副都統西捻平賜頭品秩充西甯辦事大臣光緒六年調烏里雅蘇臺參贊大臣時中俄有違言俄軍窺吉林邊壤朝命喜昌佐防務因上言琿春爲兵衝要地宜練馬隊二千步隊八千資守禦踰歲抵琿春相度地勢迺專屬伊克唐阿防守事而自率所部頓磨夷石阨雙城紅土巖來路上建之和議成授庫倫辦事大臣條上邊防六事尋謝病歸十七年卒予易州建祠

升泰字竹珊卓特氏蒙古正黃旗人入貲爲員外郎銓戶部出知山西汾州府有政聲回寇擾境錄守城功晉道員除河東道歷浙江按察使雲南布政使光緒七年賞副都統銜充伊犁參贊大臣尋授內閣學士明年署烏魯木齊都統與俄羅斯定阿爾泰山邊界俄人遇事齟齬升泰執原議不稍讓始受約束十三年改充駐藏幫辦大臣時藏人築卡隆阿爲印度所敗上命辦事大臣文碩令藏人徹卡文碩謂爲藏地無可徹嚴旨責焉以升泰代之而藏人誓復仇頓

兵帕克里將痛擊印軍升泰搜集乾隆五十三年舊檔哲孟雄受偪廓爾喀達賴以日納宗給之以雅拉木支兩山爲界持示藏人藏人曰地雖予哲今哲通英宜收回升泰數止之不從英使愿講和朝旨令升泰赴邊界與印官議約十四年印軍收哲全境藏兵又敗咱利亞東朗熱並失隙愈深羣思報復升泰數屢止之仍不從會天寒印官趣升泰赴議而藏人請代索哲孟雄布魯克巴侵地否則傾衆一戰升泰仍百計諭藏僧戒藏番毋妄動及至邊布部長遣兵千七百人護衛升泰慮爲英口實謝去并乞印綬封典升泰允代請諸朝既與英政務司保爾會於納蕩索藏債兵費升泰曰哲爲藏屬索費無名英人又在布境及後藏于壩修路藏人益大震英官要求甚奢升泰力折之藏人漸就範升泰數要英撤兵英不可升泰以大雪封山運糧無所退駐仁進岡英人既掠哲地復驅其部長土朵朗思置之噶倫棚招印度廓爾喀游民墾荒廷議以哲事無從挽救慮梗藏議論升泰勿問藏哲舊界本在雅拉支木後商人往來咱利爲新闢捷徑升泰議以咱利山分藏哲界以符前案其印哲界在日喜曲河擬

約中註明哲部長母挈兩孫赴升泰管泣訴丐中朝作主升泰無如何英人又欲易置其部長升泰力阻之士朶朗思謂愿棄此居春不升泰弗許慮英責言也十五年春藏兵徹退升泰請總署達英使電印軍速徹退既徹而英人猶久不訂約升泰上疏略謂聞藏人言與有仇之英議和不若與無仇之俄通好設藏番果與通款英俄必互相猜忌後患方長乞告英使電趣印督速定藏約又言與英初次會議英人欲至藏貿易告以番情疑詐始許退至江孜力言再四又許退至帕隘臣力諭藏番通商萬不能免始出結遵辦今英慮他國援以爲請忽議中止在藏人固所深愿在俄人亦不能有所干求惟日後防範宜嚴未可再涉疏懈入夏至今曠日持久請敕總署牒英使速議結十六年以升泰爲全權大臣與印督定約八款自布坦交界支莫挾山起至廓爾喀邊界止分藏哲界哲境歸英保護所謂藏印條款是也語詳邦交志十八年卒於仁進岡事聞優詔賜卹

善慶張佳氏滿洲正黃旗人黑龍江駐防初從勝保征捻積勳至協領賜號濟

特固勒忒依巴圖魯克鳳陽擢副都統論復定遠功晉頭品服同治元年追捻至靈璧平宿州寇墟創發乞病去踰歲朝旨以捻事棘命選吉林黑龍江騎旅赴皖軍抵河南張之萬疏留連敗粵寇於南陽及湖北陽邳灘鮮花鎮坐所部兵馬疲瘠褫職仍留軍四年授吉林雙城堡總管以戰功復故官卽於軍前除杭州副都統再坐管馬侵踏民田褫職追擊竄賊大同集被宥六年與劉銘傳勦東捻敗之濰縣松樹山捻奔贛榆追及之銘傳自當賴文光而令善慶當任柱任柱殊死鬪善慶令騎旅下馬結陣疾擊之尸山積猶進不止會大霧窈冥不見人銘傳分軍襲其後善慶率隊大呼衝殺槍礮雨空降人潘貴升斬任曾於陣善慶乘勢追擊斬賊千餘級論功賞黃馬褂賴曾勢益蹙阻瀾河弗能達迺據壽光王胡城銘傳等分左右進善慶與溫德勒克西拒之追至鳳凰臺爲他將所敗就縛於揚州予騎都尉世職七年西捻平張總愚自沈於河餘匪爲善慶等所殲晉二等輕車都尉赴本官擢杭州將軍杭州駐防自克復後崑蕩規復營制連成重建營壘善慶至籌設漸備光緒改元調紱遠城厯審夏江寧

召還授正紅旗漢軍副都統駐師通州十一年充御前侍衛佐海軍事務十三年出爲福州將軍次年卒予建祠諡勤敏柏梁字研香瓜爾佳氏滿洲正白旗人杭州駐防父麟瑞咸豐末陣亡乍浦見忠義傳柏梁少從其叔父鳳瑞出隸李鴻章軍轉戰江浙攻太倉州柏梁自南門先登復攻蘇州戰於黃天蕩陣斬悍目攻嘉興宜興江陰金壇柏梁皆有功改隸勝保軍戰江北屢捷累保至協領賞花翎杭州克復調歸駐防補協領承歷任將軍辦理營務善慶尤倚任之光緒中駐防初設洋槍隊以柏梁充全營翼長兼掌兵司規畫營制均照新軍式訓練紀律肅然叙勞以副都統記名入覲奏對稱旨以曉暢戎機訓練出力賞頭品服駐防舊有旗倉久爲兵燹柏梁請撥款重建旋授乍浦副都統乍浦駐防營燬於粵亂副都統駐杭州柏梁莅任歲至乍浦巡視海防以勞卒賜卹如制

恩澤字雨三噶奇特氏蒙古鑲藍旗人荊州駐防光緒初以佐領從金順出關克黃田復烏魯木齊諸城擢協領其秋回寇奔呼圖壁追擊之大潰又阨之頭



屯河白彥虎益窘進攻瑪納斯轟潰城垣數丈恩澤先登諸軍繼之城拔晉副都統歷權巴里坤烏魯木齊領隊大臣以劉錦棠薦除吉林副都統移彈春二十年日本敗盟與將軍長順籌戰守迺治團練築臺壘設疑兵敵知有備引兵去尋署將軍其時東山馬賊猖獗伯都訥烏拉教匪乘機竊發竄擾官街白旗屯恩澤聞警率師分擊之夷其堅堡又遣提督雲春等搜東山逸匪明年調黑龍江督邊防先後疏請改練洋操招墾荒地賑恤窮乏俄而鬍匪據靑山南北圍謀劫金廠恩澤調知之嚴備以待已寇果至營官王槐林等迎擊大敗之別遣將大搜山林自是首靑音山訖烏蘇里滿卡千餘里無寇蹤又以撓力溝素窟匪留兵鎮攝之上以爲能降敕褒嘉二十五年卒於官予黑龍江及立功省分建祠

銘安字鼎臣葉赫那拉氏內務府滿洲鎮黃旗人咸豐六年進士選庶吉士授編修除贊善累遷內閣學士歷泰陵總兵倉場侍郎同治十三年調盛京刑部德宗續業充頒詔朝鮮正使光緒二年勘事吉林條上四事曰剿馬賊禁賭博

設民官稽荒地上睦之命署將軍吉省武備久弛寇盜充斥銘安莅任嚴治盜復募獵戶爲礮勇號吉勝營先後檄統領穆隆阿協領金福分道追剿斬馘甚衆益練西丹部隊八百入山窮搜寇勢漸蹙已復捕治東山逸匪禽誅金廠黨魁軍威大振默念吉省幅輳四五百里斷非十數委員能濟事且旗員未諳民治請破積習調用漢官部臣尼之銘安抗疏力爭始俞允五年實授又言盜賊雖平餘孽未靖亟宜增置民官畫疆分治先後奏改伯都訥同知長春通判理事爲撫民置知府巡道各一賓州五常同知二雙城通判伊通州敦化知縣各一並請無分滿漢又奏弛秧漫禁免山獸貢增各旗義學士民利賴之東北與俄接壤舊設卡倫無兵駐守迺遣將分阨要塞並築營伯力紅土崖雙城子守以重兵因上安內攘外方略稱旨長春號難治銘安稔知鍾彥才奏請除通判部臣以違例請下吏議銘安盛氣抗辯上兩解之然銘安終不自安引疾去尋坐失察屬吏受賄降三級二十三年上以治吉有功部民感念復故官明年鄉舉重逢加太子太保宣統三年卒年八十四詔優卹諡文肅

恭鏜字振魁博爾濟吉特氏滿洲正黃旗人大學士琦善子以任子授吏部主事累遷郎中兼內務府銀庫員外郎充總理各國事務衙門章京出爲湖北荆宜施道論捕獲江陵教匪功加按察使銜同治十年擢奉天府府尹坐事降光緒三年賞二等侍衛充烏魯木齊領隊大臣越二年遷都統先是陝回阿渾安明客參將索煥章家煥章者前甘州提督索文子也素蓄異志戍卒朱小桂告變提督業普冲感煥章言誣斬小桂及煥章反烏城陷業普冲被害至是恭鏜廉得實請予平反奪索文榮典分別卹小桂業普冲及赴援殉難諸臣人心稱快賜頭品秩九年除西安將軍病免十二年署黑龍江將軍疏請舉辦漠河金礦杜俄人覬覦又建議墾荒十利曰儲國帑濟民食嚴保衛便輯綏裕經費富徵收集商賈益釐稅廣生聚實邊備詔不許十四年實授明年移杭州入覲道卒天津詔優卹子瑞澂自有傳

慶裕字蘭圃喜塔臘氏滿洲正白旗人以繙譯生員考取內閣中書充軍機章京兼總理各國事務衙門行走從文祥赴奉天剿匪還補侍讀出知湖北鄖陽

府追錄平捻功晉道員光緒元年擢奉天府府尹歷遷至漕運總督調河東河道九年除盛京將軍明年法越構衅慶裕巡視沒溝營旅順口大連灣諭示居民曰有能殺敵立功禽獲奸細者賞又遵旨增練蘇拉千人食饌旗兵五百上言整頓旅營兼顧海防今日多一兵即有一兵之用異日補旗兵即可裁客兵之饌所費者少所繫者重詔嘉許之朝鮮亂作檄提督黃仕林等扼隘口以營口爲兵衝要地連石塞海口設電綫達省城建議籌邊籌饌機宜附陳宜變通者三事一道府年終加考一推廣薦舉卓異一崇府尹品秩行巡撫事議行十一年安東十二州縣告災慶裕籌賑撫卹民獲甦是秋塞兩遼河大凌河暴長田禾被淹發倉以濟設粥廠牛莊田莊臺收養之明年金州蝗旱魃爲虐又明年興京水祲賑如初十九年授熱河都統道孫河牛壁店上流民被災就食狀並請變通盜案稅額章程又使吏捕平泉黑役爲害鄉里者頗著政聲二十年調福州將軍閩海關沿襲舊規吏胥因緣爲奸上敕其整理既至鈎稽糾剔獨苛息煩弊風盡革其秋卒於官卹如制

長庚字少白伊爾根覺羅氏滿洲正黃旗人以縣丞保知縣伊犁將軍榮全調充翼長時白彥虎糾西甯回匪寇烏垣進圍哈密安集延曾帕夏並僞元帥馬明衆合烏魯木齊古牧地昌吉瑪納斯呼圖壁漢回撲犯沙山子與爲逆應勢張甚長庚奉榮全檄領練勇赴援而烏魯木齊都統景廉所遣黑龍江管總伊勒和布兵亦至兩軍夾擊殲擒殆盡卒解沙山子圍旋贊都統金順戎幕總理營務積勳至道員光緒六年授巴彥岱領隊大臣未幾丁母憂服闋入覲上召見垂詢西北情形長庚手繪輿圖奏陳邊事以阿爾泰山宜設防守伊犁邊防宜籌布置纏金等境宜開屯田漠北草地宜善撫綏及哈薩克應仿例編爲佐領等條以對遷伊犁副都統十四年命充駐藏大臣行次裏塘值隘對番族叛長庚暫住碩般多廉知覺由番官肆虐釀成邊員授以機宜調集漢土官兵聲罪致討殲渠宥脅戢懲藏官事乃就緒議者遂欲收其地仍歸川轄長庚以瞻對自乾隆以來叛服靡常勞師糜餉同治初年西藏底定奉旨將瞻對劃歸達賴喇嘛派堪布管理今若蹊田奪牛使朝廷失信於衛藏恐所得小而所失大

乃爲詳定善後章程與將軍岐元川督劉秉璋等同上藏亂遂定擢伊犁將軍時伊犁當大亂後萬端待理長庚至多所規畫葱嶺西有帕米爾者卽唐之波謎羅也東距疏勒約一千四百里乾隆二十四年將軍富德窮追回曾一至其地立碑記焉然稱之爲葉什勒庫爾未明言帕米爾三字嘉道以來久未顧問碑亦湮沒咸同後俄人遽以哈薩右中各部與浩罕八部設土耳其斯坦斜米七河費爾干等省甚至塔城西之舊雅爾城阿克蘇之察林河卡倫同就淪胥葱嶺東有坎巨提者一名乾竺特其都城曰棍雜與哪咯耳隔水相望在莎車州西南約二千里其西北可通帕米爾坎民貧而多盜其酋縱掠鄰郡英人責言牒告我政府坎酋又交通俄人英使臣以割分帕地請政府恐啟俄爭拒弗許時英俄各以兵壓境長庚致書新疆巡撫陶模謂屬地當爭邊地當守兵燹萬不可開況能戡土匪之將士未足以禦強敵軍中所資仰給內地及濱江海各省數月乃達而俄境鐵軌已至薩瑪爾干英屬鐵軌已至北印度之勞爾遲速迴殊又新疆南北路與俄地犬牙相錯者幾五千餘里雖兵倍加不敷防守

且俄若以輕兵由齊桑斯克走布倫托海犯鎮西哈密卽可梗我咽喉當此民窮財匱之時尤不可輕戰只能備豫不虞徐圖轉圜毋以小忿遂起大釁增兵徒增民困陶模以爲然卒如長庚議又伊塔之間有巴爾魯克山者西連俄界南逼精河西南與博羅塔拉接壤爲伊塔要道泉甘土沃久爲俄人垂涎自借與俄後俄人視爲己有先是北路劫盜多竄此山擾行旅前副都統額爾慶額請租借期滿索回總署以俄使有續借之請函詢情形長庚詳陳利弊謂此山關係重大急應收回隨遣員赴塔城與俄領事會商堅持人隨地歸之約卒收回二十年甘回作亂官軍兜剿賊不能得志於甘欲循白彥虎故事西竄新疆由伊犁遁俄境長庚諜知遣兵扼守珠勒都斯等地賊不能越遂就禽於羅布淖爾二十二年命兼鎮藍旗漢軍都統二十六年拏匪肇亂俄人調兵入伊長庚與俄領事交涉凡教堂及俄人財產力任保護諭令退兵人心乃定調成都將軍未之任奉電旨飭赴阿爾泰山查勘界址旋內召授兵部尙書三十一年復授伊犁將軍疏陳伊犁應辦事宜並言籌餉練兵必合新疆全省籌畫將軍

事權不屬莫若裁去新疆巡撫伊犁將軍增設總督兼管巡撫事宜庶呼應靈而事權一又籌擬北方興屯置省事宜請築西安至蘭州歸化至包頭包頭至古城各鐵路皆不果行宣統元年遷陝甘總督三年武昌事起西安等處繼之前陝甘總督升允奉命督辦軍務事略定遜位旨下長庚乃將總督印交布政使趙惟熙而去越四年卒諡恭厚

文海字仲瀛費莫氏滿洲鑲紅旗人以繙譯舉人考取內閣中書充軍機章京遷侍讀光緒九年轉御史建言培養人才宜令中外大臣杜徇情勵廉恥以植其本上嘉納焉十二年巡視北城以兄文治授詹事依例迴避調戶部郎中十四年出知貴州安順府調貴陽所莅有聲二十二年數遷至按察使尋加副都統充駐藏辦事大臣既至即上言叛番雖靖餘孽猶存兵未可罷愿自任剿辦二十五年呼圖克圖第穆構巴康刺麻用邪術咒詛達賴文海曰此關風化不可不有以懲之也迺奏請奪其名號已而野番出掠博窩地爲川藏孔道行旅苦之官軍入昂多往捕彼即阨縮隆岡來路颯強莫能制文海率衆進擊別遣



通番語者繞道叩其壁宣播朝威反覆開喻於是上博窩業舁第巴宿木宗中博窩兩茹寺下博窩蒲隆瓊多諸寺皆相率乞款附數月而事定賜頭品服未幾遊疾請入川療治卒於塗依尙書例賜卹予入城治喪

鳳全字莚堂滿洲鑲黃旗人荊州駐防以舉人入貲爲知縣銓四川光緒二年權知開縣至則使吏捕仇開正開正故無賴痛以重法繩之卒改爲善李氏爲邑豪族其族人倚勢所爲多不法鳳全直法行治雖豪必夷以故人人惴恐歷成都綿竹補蒲江署崇慶州一如治開舉治行第一擢邛州直隸州二十三年調資州大足縣余蠻子亂起其黨唐翠屏等構衆入境鳳全迺治城防設閒謀練鄉勇聯客軍謀定寇至亟遣軍間道襲擊戰太平場捕斬略盡復越境搜治餘黨不兩月而事寧州屬患水被民多失業設法賑濟之全活甚衆再以治行聞調署瀘州二十八年權知嘉定府緣江會匪嘯聚旣莅事舉團練嚴治通匪土豪居民莫敢玩法無何拳匪延入蜀嘉定當水陸衝郡中一夕數驚鳳全內固人心外嚴拒守嘗提一旅師四山游弋匪不敢近故隣境多破碎惟嘉郡差

全各國僑民多樂就之繇是名大著岑春煊性嚴厲喜彈劾屬吏鮮當意獨亟賞鳳全一再論薦遂成綿龍茂道特加副都統三十年充駐藏幫辦大臣行抵巴塘見土司侵細民刺麻尤橫恣久蔑視大臣鳳全以爲縱之則滋驕後且嬰患因是有暫停剃度限定人數之議刺麻銜之深遂潛通土司嗾番匪播流言阻墾務漸至戕營勇燔教堂勢洶洶鳳全率衛兵五百人往至紅亭子伏突起戰良久被害事聞予建祠設威愍繼室李佳氏留成都聞變率子忠順馳入打箭爐辨遺骸隨喪歸省垣祠旣成迺觴將軍總督以下官及文武士紳告靈安主慨然曰吾可以見先夫於地下矣事畢夜赴荷池死獲附祀鳳全清操岐特號剛直然性忤急少權變不能與番衆委蛇故終及難云

增祺字瑞堂伊拉里氏滿洲鎮白旗人密雲駐防以佐領調黑龍江佐練兵事歷至齊齊哈爾副都統光緒二十年署將軍二十四年擢福州將軍充船政大臣兼署閩浙總督旋遷盛京將軍奉天自中日戰後副都統榮和壽長編練仁字育字兩軍營務廢弛增祺奏請派員查辦上命李秉衡往查奪二人職交部

治罪軍制肅然二十六年拳匪亂作副都統晉昌率衆附和增祺不能阻遂啟戰費奉省自日還遼南旅順大連既轉歸俄租復築鐵道沿路皆駐俄兵戰累挫蓋平熊岳先後失守增祺先以敵強兵脆大局不支連電上達並照會旅順俄水師提督營口俄領事磋商停戰不果俄兵遂抵省城諸軍皆潰增祺奏請恭奉盛京大內尊藏聖容太廟冊寶山城俄兵至招增祺還商議善後增祺往旅順與俄議訂奉天交地暫約九條以荒謬交嚴議詔革職尋仍留任諭楊儒向俄外部商改以吏治兵權不失自主爲要二十八年交收東三省條約始成俄兵駐奉數年遇事強橫無復公理增祺隱忍周旋憂勞備至至是駐兵始退未幾復有俄日之戰朝旨守中立增祺嚴飭文武官吏堅明約束並告兩國主兵者勿得犯中立日兵迫省亟勸俄兵先退日兵官始入城省城幸免戰禍三十年冬諭增祺賑撫東三省難民並發內帑三十萬賑之明年懿旨復發內帑三十萬賑恤增祺招集流亡商民復業頗留意吏治先後增設洮南海龍遼源開通靖安西安西豐等府縣凡牧廠園場及蒙荒逐漸放墾奉省財政素絀徵

權一切向無定章咸豐後始辦貨釐光緒初始辦鹽釐增祺銳意清理籌辦糧酒烟藥各稅明定規章變通鹽法就廠徵稅歲入漸增尤嚴治盜以增官設治爲弭盜清源之本三十一年以憂免三十三年授寧夏將軍改正白旗蒙古都統宣統元年遷廣州將軍兼署兩廣總督三年調京仍授都統兼弼德院顧問大臣旋去職越八年卒諡簡愨

貽穀字藹人烏雅氏滿洲鎮黃旗人光緒元年舉人以主事分兵部管員外郎十八年成進士選庶吉士授編修累遷內閣學士兩宮西幸貽穀聞警步行追及宣化流涕入對隨扈西安授兵部左侍郎屢召詢時政直言無隱上皆嘉納明年扈駕還京兵部公署已燬假柏林寺爲廨舍貽穀昕夕泣事如在行在時是冬山西巡撫岑春煊奏晉邊察哈爾左右翼及西北烏蘭察布伊克昭兩盟荒地甚多請及時開墾派大員督辦詔以貽穀爲督辦蒙旗墾務大臣貽穀有經濟才艱貞自勵既奉命銳以籌邊殖民爲己任其督墾地界綿延直晉秦隴長城河套凡數千里統籌全局擬陳開墾大綱規畫至詳疏入報可並加理藩

部尙書銜節制秦晉隴沿邊各廳州縣旋復授綬遠城將軍事權始一貽穀首  
重官墾立墾務局設東路公司官商合辦初辦察哈爾右翼改舊設押荒局爲  
豐寧墾務局旋分爲豐鎮寧遠兩局清查舊墾招闢生荒派員丈勘繪圖酌留  
蒙員隨缺地畝及公共牧廠其餘乃悉開放之牛羊羣地錯處左右翼間直隸  
山西民戶頻年互爭貽穀親往勘之由固爾班諾爾中分界址其爭始息繼放  
察哈爾左翼地爲留牧廠隨缺與右翼同移正黃旗牛羊兩羣於商都牧羣又  
移驅馬羣於騾馬羣籌撥直晉邊廳學田烏蘭察布伊克昭兩盟夾河套爲部  
落烏拉特三公杭錦達拉特數旗尤逼近套其地恃河渠灌之自元明以還渠  
盡湮廢或並古道不存貽穀躬蒞其地相度修通長濟永濟兩大幹渠又疏濬  
塔布河五加河老郭諸渠增鑿枝渠數十子渠三百餘道水利始興先後六年  
始自察哈爾兩翼八旗而推之二盟十三旗以及土默特綏遠右衛興駐防馬  
廠各地凡墾放逾十萬頃東西二千餘里絕塞大漠蔚成村落衆皆稱之復以  
時創設陸軍置槍礮器械築營壘興警察立武備陸軍學校及中小蒙學校數

十所創工藝局婦女工廠資送綏遠學生出洋或就北洋學堂肄業建設興和  
陶林武川五原東勝五廳練巡防馬步十營修繕綏遠城垣濬城外溝渠建築  
蒙地卹屯植樹造林勸課園圃果實蔬菜暇輒就田間耕夫婦暨問疾苦或策  
單騎馳營壘召士卒申儆之教之以習勤崇儉戒嗜好勤勤如訓子弟不率者  
乃罰譴之方其治河套墾地蒙人時起抗阻台吉丹丕爾攘其旗主地戕文武  
官吏貽穀請於朝誅之衆始帖伏三十四年貽穀劾歸化城副都統文哲琿侵  
吞庫款而文哲琿先以敗壞邊局蒙民怨恨劾貽穀朝命軍機大臣鹿傳霖等  
往查傳霖以已革布政使樊增祥等爲隨員奏復褫貽穀職逮京下法部勘問  
三年不能決卒坐誅丹丕爾事譴戍川邊宣統三年赴戍方經鄂武昌變起直  
隸總督陳夔龍奏請進止詔改易州安置國變後嘗自歎曰昔姜嫄譴戍宣城  
衛自號宣城老兵吾其終此矣即死必葬於是丙寅年卒晉邊官紳念其德請  
昭雪釋處分遂葬易州白楊村成其志信動宇懷民鉅帖祿氏滿洲鑲黃旗人  
以蔭生累至浙江布政使署巡撫代貽穀爲綏遠城將軍督辦墾務踵其遺規

益勳遠略頗禮致賢才思有所建樹功未竟而遽能辛亥後久病卒

論曰將軍都統職視專圻西北邊疆大臣與之並重非才足當一面者不能任也榮全升泰以下諸人或多戰績或著邊功或勳旂務或兼民治所至皆能盡其職多有可稱故並著於篇

清史稿

列傳二百四十一

劉錦棠

張曜

劉典

金順

穆圖善

文麟

劉錦棠字毅齋湖南湘鄉人松山從子也從松山討捻積助至同知直隸州從入陝復同州朝邑釋省城圍擢巡守道同治七年左宗棠西征從克懷遠鎮邊還定綏德賜號法福浚阿巴圖魯進軍甘肅攻金積堡夷旁近七寨破靈州九年擊馬五寨松山戰死詔加三品卿銜接統其軍軍新敗偏裨自恃為宿將滋驕錦棠禮詘之喪懸吳忠堡或請徙它處錦棠不可曰檄在軍可繫將士心宗棠貽書為列堅守退頓二策錦棠謂不力戰則靈州不保必勦力致死而後軍可全於是一戰禽馬五再戰破河狄軍復振是時馬化龍燄日熾三決水困我軍錦棠三拒之不獲逞糧且匱率其子耀邦乞款附錦棠曰諾令若先繳馬械不應再引馬連水入湖會大風從西北起潞潞堤岸勢洶涌錦棠囊土以禦化



龍計益窘哀詞乞耕墾錦棠知其詐隱卒下橋永甯洞又敗去乘勢下蔡家橋克東關化龍度不得脫於是三鍾軍門乞撫矣錦棠白宗棠請進止迺徙陝回化平川而分置甘回於靈州論功予雲騎尉世職賞黃馬鞋十年誅化龍父子生致馬八條置喪所櫛而祭之遂與喪歸明年度隴攻西甯次碾伯平戎驛先破小峽遣軍奪南北兩山圍解道員郭襲之率男婦二萬縵負來迎是役也提湘軍八十營隄攻九十里往往徹夜不休露立冰天雪窖中詔嘉之十二年克大通斬叛官馬壽遵陝回爲旌善五旗餘徙平涼秦安清水白彥虎奔肅州方湘軍之定西甯也宗棠緣事責錦棠盛氣辨衡之以故徇肅州未下亦不召及錦棠至又大喜爲夸其軍以厲衆錦棠計誅馬天祿殺土回客回立盡關隴平權西甯道明年破河州獲閃殿臣伏誅迺合諸將還回於賈家集郭家嘴殲焉光緒元年出關時彥虎走依安集延帕夏阿古柏助之勢復熾二年至阜康與金順計事議先攻古牧遣將分壁木壘河而自領軍軍九營街度戈壁乏水伴掘井以懈敵陰遣精騎襲奪黃田通汲道收古牧地錦棠策烏城寇必駭奔復

自將精兵走之遂復烏魯木齊迪化子騎都尉世職三年春踰嶺西南攻達板寇引湖水衛城泥深及馬腹錦棠周城徵循誠各營警備列燧如白晝轟擊之彈落爆藥響聲砉然人馬碎裂迺下令軍中曰能縛獻服異服者賞於是愛伊德爾呼里以下皆就俘愛伊德爾呼里猶華言大總管也且釋降回數千給資糧縱歸或請其故曰俾歸爲我宣播朝威也吾欲以不戰勝之自是破吐魯番托克遜南路門洞開阿古柏如失左右手亦被執飲藥死賞雙眼花翎已而彥虎據開都河西岸覬入俄師抵曲惠與余虎恩分擊彥虎亦決水以阻錦棠入喀喇沙爾城廬舍漂沒迺徙和碩特帳房河東數百戶實後路復庫爾勒會軍中患飢乏下令掘窖糧獲數千石以濟連下庫車拜城其南纏回苦安集延淫暴久重以彥虎奔擾益不堪命旦夕望我軍如時雨比至各城阿奇木伯克阿渾玉子巴什各攜銅醕持牛羊來犒師抵阿克蘇錦棠先入城受降畢回皆扶服聞彥虎奔烏什亟遣旌善旗渡河復其城於是東四城俱下詔晉三品京卿值喀城守備何步雲告亟遂大舉出師令虎恩黃萬鵬分道進取而自率師徑

搗葉爾羌並克之彥虎遁入俄錦棠進定英吉沙爾遣董福祥收和闐西四城亦下錫二等男四年錦棠既定喀城以次巡歷葉爾羌和闐凡西人僑居其地者英乳目阿喇伯十餘人印度溫都斯坦五千餘人咸服其勇略稱爲飛將軍云方彥虎之入俄也俄人處之阿爾瑪圖錦棠猶致書圖爾齊斯坦總督謂將入境搜捕宗棠勸止之俄復徙之托呼瑪克其秋彥虎又遣黨犯烏什邊騷入格爾品錦棠扼之瑪喇爾巴什別遣將要其歸路大敗之未幾安集延入又破之玉都巴什是歲補太常寺卿轉通政使五年安夷復搆布魯特內犯戰烏帕爾捕斬二千餘級自是邊寇頗息警維時俄據伊犁宗棠疏請崇其秩資鎮撫詔佐軍事俄益增兵守納林河已宗棠入都上以此專屬任錦棠關外事命署欽差大臣徙頓哈密益治軍逾歲除眞八年和議成錦棠策善後請設新疆行省省置巡撫布政使加領迪道按察使街道府州縣視內地立城垣壇廟學校驛傳又廣屯田興水利南疆歲徵賦至二十餘萬石九年擢兵部右侍郎加尙書銜旋除新疆巡撫仍行欽差事十一年進駐烏魯木齊奏省參贊大臣改置

都統設喀什噶爾阿克蘇巴里坤提鎮各營復增道府廳縣徙分防官駐要塞  
南北郡縣之制始定先是錦棠以祖母老病累疏乞歸省不許十三年申前請  
始俞允錦棠悉召諸部酋長大酺遂發所過黃童白叟望風相攜負以迎往往  
擁車數日不得走十五年加太子少保衛明年晉太子太保二十年晉錫一等  
男會弟肅以山西按察使入覲垂詢近狀欲強起之適中日有違言電旨趣召  
未行而病作朝廷書問日數至疾革時猶喃喃呼舊校指述邊事未幾卒年五  
十一事聞震悼諡襄勤予建祠

張曜字朗齋其先上虞人改籍大興既復隸錢塘生有神力幼嘗持竿結陳部  
勒羣兒無敢譁者少長依舊嫺嫺賀孫賀孫宰固始適豫捻起集團勇三百屬  
之捻款至時已昏曜獻策謂伏軍城外彼不知衆寡可以計走也夜半捻縱掠  
轟擊退僧格林沁追捻亟遙見火光詢知爲曜部召與語甚悅命從軍積勳爲  
知縣權知固始皖捻來犯嬰城守寇駸駸西去亡何李秀成又構捻入圍城三  
匝捍禦七十餘日城獲全上嘉其功賜號霍欽巴圖魯咸豐十年擢知府先後

遭憂仍留軍討皖捻屢捷晉道員明年除河南布政使是時陳大喜張鳳林各樹幟延擾數千里躍謂寇援斷師未能驟克寨中患飢乏多猜貳宜廣設購募開其黨迺縱降者爲內應捻迺竄風諭各寨皆款服鳳林僞降計禽之同治元年御史劉毓楠劾其目不識丁詔改總兵二年大喜走阜陽戰秦宜樂皖捻復入躍慮華莊失亟歛兵退以銳師宵加之殲渠率時張總愚走鄆陵臨穎欲西躍拒之嵩山麓令不得西攻大金店援寇四起遣總兵保英略中路爲寇乘躍手刃退縮者士氣迺奮卒敗之攻太子望樂久相持躍曰捻詭悍堅守山口阻我進兵坐爲所綴非策也間道出奇擊之總愚西北走鎮平追殺黑龍集犯南陽又戰郤之三年捻會宛南總愚赴盧氏嗾粵寇入豫躍扼之使不能合次橋川寇自西北至狙伏以擊寇奔楚躍浮渡丹江追越郛西百四十里會陝楚軍至而還四年僧格林沁軍麻城騁騎失利躍赴難七戰皆克僧王旣戰死臺臣劾其養寇遺患巡撫吳昌壽按覆事白躍假歸葬親踰年淮北捻益亟朝旨趣復出躍遂部合新舊選鋒號嵩武軍厥後軍氣大振論者謂爲湘淮軍後勁云

六年出頓許州八里橋任柱等見曜大譟賊走梁山寇與合五日至鉅野渡運而東曜與總兵宋慶往馳之當是時李鴻章議防運河北首安山訖沈家口曜等至令慶築長埧慶留副將蔣東才參將李承先二軍屬曜曜以沈家口黃運交匯調黃河水師入運助守河防運自此始久之總愚陷陝綏德分擾米脂朝命防河北捻濟河入晉犯吉州鄉甯平蒲告警檄曜還豫而捻已自絳州曲沃入偃豫疆曜迺追敗之湯陰七年捻東走扼晉州西北路折而南諸將謀逐之曜謂賊勢未燼遽南奔必有深謀迺卷甲北趨出其前二百里至饒陽果遇捻捻不敢擊錯愕去潛渡漳沱亟引兵至河干未渡者殲焉濟漳次清化捻伐木爲矛又擊破之長驅滄州劉松山軍運東曜自南夾擊捻披靡追至臨邑初李鴻章遣郭松林自臨邑築牆屬之馬頰河盧西南以餌敵逮曜馳至捻不肯深入走濟陽鴻章知計不售使曜趨武定遇捻於濱州始敗退會天大雨河暴漲諸將慮捻東逸謀扼徒駭河曜自博平守至東昌誘捻入河套與慶合擊之捻衆陷泥淖中死者枕藉自是總愚不復能軍逐北在平殺其黨且盡騎能屬

者十餘人耳總思自度不得脫迺沈於河論功賞黃馬桂子騎都尉世職八年詔趣左宗棠赴涇州責金順以邊外事命隴自古城西進爲後路軍次蘭扇破回於察漠綽爾又敗之紅柳樹阿拉善圍解抵纏金調知甯夏西岸自石嘴山至中衛陝回膺集遣將要擊之回遁走金順赴沙金托海與議進兵事方將鼓行而西而甯夏降回復叛圍郡城遂倍道應赴敗之城下俄而陝回入賀蘭山躍赴河北南破洪渠集團納中間拔其壘與金順夾渠而軍殲守賊殆盡會金積撫局成通昌通貴乞款附獨王家曠不下隴怒破其堡屠之攻剋納家寨河西無悍寇詔屯之兼顧阿拉善旗是爲甯郡河北之師九年授廣東提督仍留軍明年加雲騎尉世職白彥虎據肅州徐占彪攻弗克請益師宗棠檄隴頓金積助之上以爲勇賞雙眼花翎十三年彥虎亡命出嘉峪關窺烏魯木齊哈密城南北附之俄羅斯方擁伊犁巴里坤且岌岌朝命總防討亟援哈密隴剋日出關師行乏水草絕幕二千餘里餽餽艱阻於是議立屯田十三年出屯大興水利墾荒地二萬畝歲獲數萬石濟軍光緒二年師規南路西取七克騰木闢

展魯及魯克沁臺勝金台哈拉和卓城降纒回萬餘遂復吐魯番明年拔烏魯木齊彥虎遁入俄俄歸伊犁宗棠疏薦堪重任六年詔贊軍事命移駐喀什噶爾兼轄西四城籌善後所至戢立義塾回風殲噬至是頗聞絃誦聲十年入關防直北賞巡撫銜叙邊功晉秩頭品明年除廣西巡撫未行董所部治都城河加尙書銜旋命赴山東勘河隄歲至壽張調撫山東東省河患日深躍蒞任首重河工以黃運並淤非總濬通海不爲功時王家圈等處先後漫口先議疏濬海口挑淤培埝並增築徒駭河兩岸隄工以防汎濫然後挑挖全河參用西法以機船疏運凡南北兩岸隄埝口門一律籌辦疏上皆從之又先後築王家圈姚家口張村殷河大寨西紙坊高家套各決口復改濬韓家垣以洩尾閭莫不身親其事計一歲中奔走河上幾三百日有言河務者雖布衣末僚皆延致諮詢唯恐失之民或遇災常籌粟賑濟復建海岱書院於青州紺洙泗書院於曲阜士民德之十四年被命襄辦海軍明年晉太子少保命會閱南北洋海軍至煙臺聞台灣巡撫劉銘傳稱疾去則抗章請行優詔答之十七年方駐河干督



工疽發於背回省就醫遽卒疾革時猶貽書鴻章首言山東爲北洋門戶亟宜治礮事備不虞次言新疆軍精部令裁營清釐緩不濟急恐失信外域貽君父憂遺疏入上震悼贈太子太保諡勳果予建祠隴魁梧倜儻自少從戎不廢書史字法撫顏平原書疏雅馴猶餘事嘗鐫目不識丁四字印佩以自厲甯夏平築樓面黃河對賀蘭山顏曰河聲絳色日嘯詠其中人謂有羊叔子登峴風居官垂四十年不言治產事性尙義所得廉俸輒散盡尤禮賢下士士爭往歸之其修道路開廠局精製造凡有利於民者靡不畢舉死之日百姓巷哭失聲喪歸且傾城以送以兩世職併爲男爵子端本襲官南韶連道

劉典字克齋湖南甯鄉人少伏瀨山與羅澤南友善以學相期許齋匪亂集衆保鄉邑叙訓導參左宗棠戎幕轉戰江西善察形勢嘗輕騎調敵營夜率所部刼殺數獲奇捷李秀成欲以長圍困宗棠斷曾軍糧譚典敗浮梁又破之樂平婺源饒道始達祁門積助至直隸州知州宗棠撫浙典以偏師討衢嚴同治改元破馬金街進克遂安遷知府擊花園港世賢遁超授浙江按察使世賢謀據

金華分黨擾龍游湯溪蘭谿衆號數十萬典還軍援衢力據上游悉夷東南北  
寇翌明年收蘭谿諸軍亦下三城浙東告甯宗棠規杭州策江皖邊圉安方可  
一意進取迺令典將五千人道嚴出皖南當是時新復郡縣糧饋不屬典持印  
票空文向民間貸糧遇寇遮擊而屯溪而黟縣所莅風靡民望典軍如時雨以  
故壺漿塞塗沈葆楨謂其截擊寇衆功不在克省城下江皖既平賜號阿爾剛  
阿巴圖魯其秋父憂歸三年詔起督師典募新軍八千次貴溪世賢入閩陷漳  
州汪海洋亦陷龍巖勢復熾典進汀連號西路軍遇海洋新軍輕進收績還保  
連城四年再戰斬寇萬餘進復龍巖南靖世賢爲高連陞所躡奔粵宗棠麾下  
壯士騎從者八百餘人馳之典至南雄語其將黃少春曰尾寇而追非計也寇  
返奔亟必不久據嘉應當走粵閩邊左軍孤遇寇必不支迺持二旬糧取道大  
嶺脊晨夜應赴抵大埔先宗棠一日遂會師復嘉應晉二品服予世職事甯乞  
歸省五年宗棠徙督陝甘起典甘肅按察使旋賜三品卿佐軍事典自紫荆關  
入值捻竄渭北迺駐潼關偪渭而軍扼其南渡七年詔署陝西巡撫初宗棠援

晉以征回事屬典典以關中戎備寡調提督周達武壁隴汧順後路至總前敵師于則舉蔣益澧自代朝旨弗許尋復有是命典遂進駐三原調度諸軍軍大振明年與宗棠定三路剿回策已復念民事重入省治善後集流亡舉屯牧恤艱阨革差徭又以其時濬鄭白舊渠關中漸叫囑望治矣惟銳然以減餵自任諸軍舊欠各餵十給其七士卒不無怨望云又明年再乞歸省光緒元年復命佐宗棠軍務典辭以疾詔罷其行時譚鍾麟督西征餵事力言司左軍後路非典莫屬朝旨迺趣赴甘於是典三起討賊矣二年至蘭州宗棠以善後畀之凡整軍節餵以及生聚教誨有裨於民生久遠者咸殫心厥事至關外平定亦嘗指陳方略贊畫功多經營新疆凡三年卒於軍次詔視侍郎賜卹諡果敏予江浙陝甘建祠典秉性清嚴貴後自奉儉約楊昌濬嘗詣典環堵蕭然一如寒素寓書宗棠共稱之弟倬雲少隨典讀書長沙典主鄉團倬雲以廩生治軍書從援浙領偏軍戰常陷堅李汪二酋奔竄扼臨江使不得西敘知縣龍巖旣復會糧罄軍士乏食爲貸隣邑以濟民德之建生祠將軍庫克吉泰檄赴陝值連陞

營哥匪謀變戕主帥倬雲馳入殲其渠餘衆悉定再遷知府時慶陽大飢人相食倬雲興屯政立賑局流民懷集假歸適會匪亂連下龍陽益陽詔用道員越法事起赴閩綜營務署按察使以捕海盜名晉二品秩授汀漳龍道興靈桑建書院調卹隄防諸政次第畢舉尋謝病歸二十九年卒卹如制

金順字和甫伊爾根覺羅氏滿洲鎮藍旗八世居吉林少孤貧事繼母孝初從征山東授驍騎校嗣從多隆阿援湖北復黃梅賜號圖爾格齊巴圖魯移師安徽克太湖歷遷協領挂車之役將騎旅直搗中堅當者輒靡同治二年從討陝回連下羌白王閣賜頭品秩復渡渭敗之零口三年漢南回奔鳳翔趨澧峪擊卻之授鎮黃旗漢軍副都統調西安時羣寇集陝南陝回導至澧河金順禦之斬虜多回入鄂傍山西走復率馬隊邀擊敗之四年攻甯夏南門奪其礮臺已聞寇集黃河兩岸率師分路進陣斬其酋孫義保等寇稍卻明年調甯夏副都統七年復甯條梁聞榆林警遂迎擊五龍山大破之迫至邊外禿尾河馬隊忍寒裸涉要之金難灘回大潰復遣將破之葭州八年平綏德朝旨以邊外事屬

之四月回犯花馬池遣部將富勒琿馳救回自烏拉爭渡奔札薩旗金順自將出邊回已遁迺率師道札薩郡王咨拉旗自包頭迺西濟河而進會天酷暑暫頓什巴爾臺就水草與張曜期會沙金托海七月自中灘鼓行而西而甯夏回復叛迺兼程赴援敗之於城外無何甘回納萬元等迎戰漢渠復與曜從東繞擊回走納中關追至龍王廟南悉拔其東南各壘殲守賊殆盡九年金積撫局成獨王家疇未下率其弟連順分兵迎擊數獲勝自是連順無役不從積助至金州副都統金軍頗有聲明年克之賞黃馬褂又與曜破納家寨河西悍黨殲焉甯夏平擢烏里雅蘇臺將軍尋以赴鎮番未報覲職命即日赴肅州既至頓北崖頭奏調曜軍助擊時烏魯木齊提督成祿猶訴軍糧乏難赴哈密詔金順接統其軍十二年左宗棠至軍約期並進金順發地雷東北角城潰乘隙奪據其上自是老弱扶服者相繼城拔復故官烏魯木齊都統景廉駐古城與金順齟齬宗棠奏言金順寬和爲羣情所附詔率所部二十營赴之規烏城於是遂發出關數十里至瀚海吏士忽不行詢之則曰先鋒營駐有所議金順知有變

疾馳視手刃六人以徇曰敢留者視此軍以次行瀚海既過迺列六尸祝之曰  
雜賦不飽佐以野蔬天下無若西軍苦此行度戈壁之水草吾非不知但不忍  
汝六人如全軍何如國家何如關內生靈何聞其言者無不激揚道授正白旗  
漢軍都統明年至古城與景廉會師一日演礮漢回觀者數千百人景軍指敗  
堵烟筒爲的擊之再烟筒無恙所部礮隊總兵鄧增參將張玉林曰是何足擊  
請卷旗卓之爲的增先測視請於金順再測視既竟礮響旗飛若翦霞空際已  
而玉林亦爾觀者譁譁聲震遠近回聞之氣奪尋命佐新疆軍務光緒改元代  
景廉爲都統二年軍阜康劉錦棠赴軍所商進止議先攻古牧迺輕騎襲黃田  
通汲道克之連下烏魯木齊迪化昌吉呼圖壁諸城直逼瑪納斯斬其僞帥馬  
興南北二城以次皆下賞雙眼花翎予世職調伊犁將軍七年詔接收伊犁按  
圖劃界十一年二月軍標譚變五月再變並謀饗戕官伊地本極邊協饗乖時  
軍多疲饑金順馭衆寬將領營官相率蒙蔽而總督譚鍾麟劾其上下縱恣民  
怨沸騰爲陳籌饒易人之策於是上召來京以錫綸代之道肅州病卒身後不

名一錢幾無以爲飲寮案釀金喪始歸部伍縞素步行五千里至京者達二百人云事聞贈太子太保諡忠介予建祠妻託莫洛氏婚甫踰月屬事繼母撫諸弟遂出轉戰二十餘年至新疆迺遣使往迓謂使者曰太夫人老矣甯能涉萬里吾義不得獨行且彼處有姬侍宗祧不墜吾又何求竟不往時論賢之增字錦亭籍廣東新會年十七從軍積助至游擊西征之役領開花礮隊平金積取河州並以善用礮知名方是時錦棠治兵西甯寇堅壁自守而牧馬湟水北岸增隔水轟擊寇駭愕踰山遁增馳之先以輕騎當寇乍戰佯北寇易之悉衆下山我師以巨礮環擊大潰俄援寇至壁平戎驛錦棠不與戰而使增據山上俯擊寇懾礮威退湟北增復隔河擊之皆走錦棠攻高寨急昇大礮列北山上使增測準寇壘發礮子六十餘墻壁皆裂賜號伊博德恩巴圖魯規肅州城高厚踰常制增築礮臺臨城關轟潰十餘丈繼復築礮臺街口裹創力戰卒擊退之晉總兵從金順出關以戰功擢提督金順舉將才稱增精究礮術除伊犁鎮調西甯光緒二十一年解循化圍回渡河趨巴燕戎格增追至乧思觀會札什巴

陷分三路擊之城拔六月西甯回韓文秀等犯增管增分軍迎擊遇伏將卻增手刃先退者以徇衆皆躍馬陷陣寇潰時西甯南北西川大通碾伯丹噶爾皆叛增聞警馳歸守郡城八月哆吧寇來襲城薄小橋增將出拒或勸沮之增曰寇氛甚惡不力遏之是示弱也且主帥不出將士孰肯用命遂往短兵接人百其氣大敗之自此寇望見鄧軍旗幟輒不戰而遁明年克川北營城關內外平授固原提督既至會甘軍搜治海城叛回閱三年海城回田百連復叛遣將討平之罕亂作車駕西狩召赴行在回鑾節度隨扈諸軍晉頭品服旋回任三十一年卒於官詔附祀宗棠祠其時隨金順征回著績者又有托雲佈果權劉宏發曹正興托雲佈瓜爾佳氏滿洲鑲藍旗人初從軍勦髮捻賜號綽勒郭蘭閣巴圖魯攻寧夏釋平羅圍襲擊黃河兩岸數有功累遷協領坐事免金順請留軍自贖截擊竄寇於榆林復官進拔蘇家燒房納中閫晉副都統時寇據金積其旁堡砦並險固托雲佈充前鋒大小數十戰寇稍卻克王家驢賜頭品服平通昌各寨賞黃馬褂自是從出關迭克名城卽於軍前授青州副都統瑪納斯



之役血戰六十餘日天山以北告寧予雲騎尉世職光緒十一年創發乞歸賞食全俸十八年卒予優卹果權莫得里氏滿洲正藍旗人吉林駐防驍騎校從副都統福珠里出師伊犁以戰功累遷協領瑪納斯既復金順薦署伊犁錫伯營領隊大臣頓車排子屯田詔念前勞晉副都統賜號志勇巴圖魯光緒十七年調充東三省練兵行營翼長校閱吉林邊練各軍二十七年授呼蘭副都統卒卹如制宏發黃陂人正興隕西人自同治初久從金順軍復肅州進新疆屢有功後皆官至提督而宏發軍過玉門安西官民尤翕頌贊置云

穆圖善字春巖那拉塔氏世居黑龍江齊齊哈爾隸滿洲鑲黃旗家貧事親孝初以驍騎校遷參領從征直魯晉豫所向有功援安徽迭克城隘賜號西林巴圖魯同治元年從多隆阿入陝道鄧州遇粵寇陳得才敗之紫荆關擢西安右翼副都統時回氛熾率步旅阨洛水北岸半修營半出擊寇寇始奔亡何捻酋姜泰林犯武關夜襲多軍穆圖善設伏敗之追羣寇入鄂境悉驅出西河口二年再入陝攻高陵先登裹創力戰下之賞黃馬褂寇渡涇據南岸穆圖善泗水

而濟寇大潰三年多隆阿圍盤屋中礮病篤疏薦穆圖善賢遂命署欽差大臣其夏擢荊州將軍與劉蓉會辦陝事粵寇據樓觀黑水西駝峪蓉遣蕭慶高趨鄂穆圖善率師助擊戰店子頭敗績七月擊破大峪西堡進攻樓觀先是得才入鄂穆圖善遣二十八營赴援無統帥至是蓉奏請穆圖善往湖北詔勿許令移師赴甘既至與將軍都興阿議定先規甯夏十一月檄杜嘎爾額爾慶額等攻破清水堡踰歲誦知羣寇元日椎牛置酒必不誠穆圖善奪城南礮臺連燬其寨已復慮寇乘春漲決渠下灌分兵扼城東南尋調甯夏將軍主甘肅軍事嗣以甯夏諸軍久不得要領責之五年收靈州初回寇馬兆元攻陷州城馬朝清計誅之禁靈回無滋事逮甯夏失道且梗塞朝清者化龍也至是親詣穆圖善哀詞乞款會州紳亦請置官乃使豐紳等往招撫州事定聞華亭回竄慶陽復遣軍擊走之城圍解明年署陝甘總督值歲大饑人相食迺馳書阿拉善王令運蒙糧至河北與軍民交易食迺濟是時米拉溝既下河洮狄道西甯回皆反正而南八營李得昌各部乞擇地安插上慮回情叵測敕穆圖善嚴備之穆

圖善令降回繖械遣范銘赴洮張瑞珍赴蕭何城王得勝赴靜寧辦撫事自是頗惑撫議已復使曹熙等赴河州回羈之遺黨潛襲省城聲款附穆圖善率輕騎往中伏奔還遂圍城五日楚軍將彭楚漢等破之而東鄉回謁負如故穆圖善親督諸軍敗之十一月攻州城弗克還蘭州會傅先宗敗回禮縣彭忠國敗回安定穆圖善迺令進規渭源而自從金縣進七年正月克之迺使諸將會攻狄道南北兩山相崙中有平川寨卡林立先宗等一鼓破之毀其寺軍威大振於是穆圖善赴前敵北莊牟佛提率男婦三千人乞降受之師旋復叛穆圖善再渡河直搗黑山頭太子寺寇斷我糧餉戰數失利不獲已退保狄道明年狄城糧盡又退至秦州寇乘之師潰朝旨令穆圖善甘軍受左宗棠節度初穆圖善狙撫議羣回叛服靡恒而所部百數十營皆徵糧民間清水守將敖天印以橫暴激民變遂防軍殺縣役提督黃金山率所部戰狄道康家巖敗潰北入皋蘭四出淫掠穆圖善迺遣潰勇屯寧夏而嘗報敖軍於朝敖軍亦力詆之於是宗棠調度諸軍先秦州固饑源遂赴涇州受總督印穆圖善既卸事猶日歷四

鄉勸民修堡寨置軍械蘭人甚德之詔仍駐蘭州統西路軍化龍黨崔三搆河狄回出後輒敗去十年河州賊襲陷皋蘭西古城再敗之長驅北山兔窩寇大潰其冬會左軍渡河連克要塞寇退扼大東鄉師衆而殲之論功予世職光緒元年召署正白旗漢軍都統會吉林馬賊竄巴彥蘇蘇命權將軍捕治之漸散其黨與明年道員舒之翰獲譴罪及舉主視職又明年起授青州副都統擢察哈爾都統五年出爲福州將軍法人爭地越南分兵艦窺閩疆詔參宗棠軍事出駐長門警師設伏擊沈法艦一艘旣而防軍潰法人登岸搥戰伏起轉敗爲功以故閩事壞獨免議十一年詔授欽差大臣會辦東三省練兵事明年以積勞卒於軍諡果勇予黑龍江安徽甘肅建祠蘭民且樹碑誌德焉杜嘎爾哈勒斌氏滿洲正藍旗人黑龍江駐防初從都興阿征粵寇積助至佐領賜號莽齊巴圖魯嗣以京口副都統從討甘回規寧靈頗能以少擊衆寇竄寶豐克張家村紅柳堡深入沙磧背水成軍旬日間城復攻寧郡斬虜多卽於軍前調官寧夏寧城回增建寨棚首城南訖納家閘與金順誘城東寇出數敗之乘勝破護

城隄清水堡尋隨都興阿赴奉天調補正藍旗蒙古副都統歷察哈爾坐事免  
光緒六年起授烏里雅蘇臺將軍撫士卒卹蒙部十四年創發乞休明年卒諡  
武靖額爾慶額字誦堂格何恩氏隸滿洲鎮白旗墨爾根城駐防以驍勇聞歷  
遷至委參領清水堡之役賜號法福靈阿巴圖魯會諸軍克狄道授黑龍江副  
總管剿金縣竄匪擢涼州副都統命佐關外軍事統領吉黑騎旅頓西湖令寇  
不得西烏城回自奎屯敗退安集海擊卻之光緒二年聞白彥虎構瑪納斯南  
北二城回擾糧道與總兵馮桂增參將徐學功約期會師大河廠額馮二軍先  
行徑薄北城而南城回涌至桂增負傷墜馬寇昇入城額爾慶額憤甚先登陷  
陣斬寇無算因士卒傷亡多止戰屆期學功至距城十餘里見額爾慶額被創  
還遂率所部救之金順責其援不力宗棠曰額爾慶額等輕進貪功咎由自取  
且先夕進攻學功何能豫知耶歷古城領隊大臣科布多幫辦大臣命偕參贊  
大臣升泰勘界以奎峒山爲科塔兩城外蔽哈巴河南流入中國與俄官抗爭  
始得展地定界新疆底定晉頭品秩十二年調伊犁伊犁設副都統自此始莅

任七年興辦屯田軍民輯睦十九年卒卹如制豐紳字漢文吳扎拉氏隸滿洲正白旗吉林駐防都興阿督江北軍檄守揚州以戰功厯遷至協領克寶豐取甯夏數獲勝穆圖善遣往靈州招撫馬化龍就撫穆圖善上其功晉副都統尋護甯夏將軍時伏莽未靖自甯城至靈州隘口數十爲商旅來往孔道豐紳詰奸禁暴行旅便之先後平陝匪西河橫城堡補官錦州擢黑龍江將軍坐事褫職光緒間起故官厯綏遠城江甯中日事起出駐通州事寧回任二十四年卒詔優卹予建祠御史彭述劾其侵冒奪卹典

文麟字瑞圃兀扎拉氏滿洲正藍旗人道光二十二年考取內閣中書遷侍讀咸豐八年出爲甘肅蘭州道調鎮迪同治四年回竄據古城文麟上防守奇臺狀上嘉其知大體濟木薩者回衆屯糧地也文麟潛遣練勇攻克之獲糧萬數千石索煥章竄瑪納斯分掠阜康吐魯番迪化文麟分兵扼三臺要隘上疏乞濟師詔令嚴守濟木薩援未至而哈密奇臺相繼淪失亟與巴里坤領隊大臣訥爾濟合兵進擊聞寇集東路使佐領恆昌先進敗於奎蘇而自請赴前敵上

怒訶責之下部議坐擅離職守降二級調川詔以藍翎侍衛充哈密辦事大臣  
文麟遂率所部收復城垣馬金貴白彥虎先後圍攻瀕危者數矣文麟拊循士  
卒卒能以餓軍驅強敵俾纒回轉危爲安五年遭母憂改署任明年肅州回竄  
玉門戰紅柳灣敗之回復大舉犯城關文麟督軍嚴守伺間出擊圍解迺爲籌  
耕種葺廬舍訓練軍士且戰且屯服闋以頭等待衛補本官益招哈密團首孔  
才至以其練勇二百編入伍籍遣往古城興屯修堡復收徐學功散勇二千餘  
任耕戰於是古田濟木薩屯政大舉令充裨將自是數與妥明馬明白彥虎相  
攻殺所向皆捷十二年肅城回數出關犯哈密東山文麟令魏忠義出駐塔爾  
納沁堡分扼各隘剿撫馬賊擒回馬五十九旋魏軍大失利文麟飛章自劾被  
宥益感奮率所部進擊力保危城降敕褒嘉加副都統銜明年彥虎援肅州潰  
退安敦玉文麟使騎旅追之彥虎遁入山肅州平詔張曜等馳赴哈密會文麟  
進剿光緒二年卒文麟治軍數載囊無私蓄與士卒同甘苦故人皆願爲盡命  
及其沒也閭閻營慟哭失聲明春富勒銘額先後狀其績以上予褒卹附祀新疆

哈密專祠明春巴羽特氏隸蒙古正紅旗初從勝保平河北補前鋒校征陝回隸多隆阿麾下以戰功數遷副都統搗肅州壓城爲壘與回相持者半載追藍得全被重創肅州回出掠安西玉門敦煌明春馳逐三城間三月圍悉解授哈密幫辦大臣光緒二年擢辦事大臣時南疆平肅疆民悉還故土明春爲斷地畝給資糧勸使復業凡治道路繕隄防興水利有裨民生久遠者靡不具舉民德之至今猶虔祀云十二年卒卹如制富勒銘額佚其氏隸滿洲鎮白旗古城駐防烏魯木齊陷古城大恐富勒銘額出與寇戰數被創事亟如烏里雅蘇臺乞援弗應城破全家殉焉富勒銘額適在外得免於難憤詣文麟軍所願從殺賊紅柳灣之役以功擢防禦回擾安西設計抗禦斬虜多並搜治西山逸匪盡殲之解敦煌圍晉頭品秩賜號堅勇巴圖魯充古城協領西陲告甯置屯田修兵房以都統恭鐸光緒十四年授伊犁副都統時游勇構哈薩克回寇邊富勒銘額遣軍捕其酋餘燼悉平十六年署將軍增卡倫整營制索倫錫伯察哈爾額魯特兵卒咸復游牧舊業十九年徙塔爾巴哈臺參贊大臣練軍興屯收



還巴爾魯克山清界置卡其治復放伊犁屹然成重鎮二十三年乞歸二十九年卒卹如制學功烏魯木齊農家子好技擊值回亂結健兒數十掠回莊貨貨以自贍遇漢民力護之雖邊外悍回皆已憚之矣厥後附者益衆集五千人精鍊馬隊每戰突陣驟若風雨回見之輒走學功先後陣斬僞帥馬泰阿奇木馬仲仲子人得襲僞職與安明積不相能安明復以黨攻之安曾帕夏迺約學功破吐魯番進攻烏魯木齊下之安明走綏來數日死帕夏遂據烏垣初帕夏以學功善戰故與交驩冀藉其力王哈密以南八城歸獻朝廷已知其無遠略且百戰未得一階益輕之令還綏來南山於是學功大恚屢攻烏城其民人時降學功時投人得轉帳屬役迄不得息同治七年俄人構土回纏頭將襲烏垣聲赴綏來易市驅駝馬數千載貨鈔至石河去綏來八十里學功以騎旅截之俘數十人餘縱還自此俄人不敢東窺十二年彥虎率悍回數千分掠烏垣綏來學功復橫截之殺數百人奪囊駝五百彥虎勢益孤學功旣任職但承大將風指異於初起血戰時矣後與孔才並官至提督孔才哈密人

論曰從左宗棠立功西陲最名者湘軍中稱二劉豫軍中稱曜之數人者投袂  
攘難不數月廓清萬里雖張騫班超奚多讓焉金順穆圖善提塞北健兒橫行  
玉門金嶺間其志尤壯文麟名出二人下而招團興屯兼任畊戰不煩國家一  
兵遂定西邊其功亦足並傳云

清史稿

列傳二百四十二

董福祥

金運昌

黃萬鵬

余虎恩

桂錫植

方友升

董福祥字星五甘肅固原人同治初回亂作鳳翔汧陽寇氛殆遍福祥亦起安化與其州人張俊李雙良蹂躪陝甘十數州縣竊據花馬池犯綏德窺榆林潰勇飢民附之衆常十餘萬嗣爲劉松山所敗其父世猷降福祥亦率衆乞歸款迺簡其精銳者編爲董字三營福祥居中營俊居左雙良居中從攻金積堡福祥襲卡後被創不少卻破其禮拜寺頓板橋寇來爭與肅章開夾擊敗之金積堡平超授都司十一年從劉錦棠至礪伯趨峽口與陝回禹得彥崔三大戰破之進擊白彥虎於高家堡焚其壘而還己而僞知府高桂源構彥虎圍西甯撲雙良營福祥又大敗之圍解遂游擊徙守向陽堡城復討平河州叛回積功至提督光緒元年從出關戰天山會大風賁晦吏士弗敢進福祥率衆先登一鼓

殲之又破之木壘河古牧地進復烏魯木齊諸城及瑪納斯南城是時彥虎猶據開都河西岸覬入俄福祥自阿哈布拉綠塗置哨壘至曲惠而營士卒儲薪草濬井泉以俟錦棠軍至破之復喀喇沙爾是冬克和闐南置西四城告甯縣是董軍名震西域論功賞黃馬褂世職賜號阿爾杭巴圖魯安夷既就撫布魯特酋阿布都勒哈誘之復入寇色勒庫爾北走庫倫福祥馳之抵空谷根滿步卒足重輜迺邊健者乘驃隊從騎旅及之木吉寇方解鞍秣馬驚起依山而陣俊敗之福祥縱兵搜捕復斬三百餘騎自此寇不敢犯邊授阿克蘇總兵駐防喀城未幾而所部索饑譁變戕營官胡登花或請擊之福祥曰營勇與叛勇有約如昏夜響應將奈何不如閉城守彼勢孤必自斃也越三日悉爲兵民禽獻乃分別誅宥之事定領俊及夏辛酉移駐葉爾羌和闐十六年擢喀什噶爾提督二十年加尙書銜會德懷膠澳命率廿軍入衛明年西甯碾伯又告警督師還抵狄道河州馬永林叛渡洮戰卻之連破高家集三甲集道始通事密調甘肅福祥自請援西甯又明年克上下五莊乘勝復大通多巴朝命駐西甯專剿

撫以魏光燾二十七營屬之會巴燕戎格劉四復奔關外福祥亟遣騎踵之拔卡爾岡先後夷海城治諸麻甘州南山寇堡關內外及青海悉平加太子少保二十三年入覲命領武衛後軍召對福祥曰臣無他能唯能殺外人耳榮祿頗信仗之拳亂起日本書記杉山彬出永定門福祥兵殺之於是董軍圍東交民巷攻月餘不下敵兵自廣渠門入福祥走彰儀門縱兵大掠而西兩宮西幸充隨扈大臣和議成外人堅欲誅福祥李鴻章曰彼綰西陲軍寄久慮激回變當緩圖之迺褫職錮於家榮祿在西安綜大政福祥移書讓之略謂辱隸麾旌任公指使命攻使館祥猶以殺使臣爲疑公言僇力攘外禍福同之祥本武夫恃公在上故敢効奔走今公執政而祥被罪祥死不足恤如軍士憤懣何榮祿得書置不答三十四年卒其子天純輸銀四十萬濟帑復官俊字傑三金積堡之役與福祥並授都司規西甯余虎恩困峽口俊力戰解之連破小峽潤家溝從攻河州肅州以戰功歷遷至副將賜號倭興巴圖魯光緒初從征西陲復烏魯木齊擢總兵錦棠令入關募軍於是成定遠三營先後從克東西四城晉提督

安夷復叛俊倡議主剿衆論譁起錦棠獨睦之寇竄庫倫俊追至木吉分三路入戰良久手刃執紅旂悍卒寇愕走進至卡拉阿提會日已入止舍天未曙整軍復進日午及之寇不能反拒槍矛所至屍相填藉抵黑子拉提達坂止餘數十騎踰山入俄境不復追是役四晝夜馳八百餘里凡禽愛伊德爾呼里二人安夷所謂大通哈也胖色提以下數十人猶華言營官賜頭品服黃馬褂授西甯鎮總兵調伊犁二十一年代福祥爲喀什噶爾提督尋還甘肅二十五年入都充武衛全軍翼長兼統中軍踰年卒諡壯勤予建祠俊好舞刀所部衣幟皆白色時稱雪張云辛酉字庚堂籍山東鄆城初從僧格林沁討捻宗棠西征從討陝回積勛至守備攻金積裏創力戰稱驍果規肅州充前鋒拔塔爾灣黃草壩關內大定數遷至游擊師出關下阜康襲黃田破古牧無役不從進規南路攻托克遜彥虎子小虎殊死守師行不得志獨辛酉率游軍數戰略有斬禽達坂之役與余虎恩輕騎先涉列城左山岡比回覺悉力轟拒師少卻辛酉斬先退者數人迺止卒大破之邊副將賜號振勇巴圖魯從錦棠復庫車至拜城履

冰抵上銅廠回出邊辛酉躍馬徑前生禽貂衣賊一人回簷走遂下阿克蘇是時帕夏奔葉爾羌彥虎奔烏什錦棠專力討彥虎令俊進擊辛酉自西會之濟胡馬納克河行戈壁八十里破寇什城東城拔擢總兵易勇號霍伽春南豎平賞黃馬褂逸寇犯三臺辛酉隱勁騎冲亮罕山誘之出伏起短兵接斬其酋賽屹塔黑振江俄而安酋阿里達什寇邊從錦棠出屯玉都巴什辛酉率二百騎爲前驅怒馬陷陣斬執旂賊奪其旂以歸寇大潰追至畢勒套格殺其黨且盡西陲告寧乞歸養甲午之役率師鎮登州即於軍前授廣西右江鎮治軍如故尋徙鎮登州拳亂作充武衛軍先鋒左翼長從李秉衡禦敵未戰而潰後除雲南提督未到官卒卹如制

金運昌字景亭安徽盱眙人少孤遭寇亂總兵郭寶昌之母曹氏撫之從姓郭既長入貲爲守備從寶昌征髮捻積助至游擊論河防功賜號勉勇巴圖魯平畿南擢總兵晉勇號鏗僧額西捻平遷提督復姓金氏從寶昌卓勝軍還陝同治八年寶昌創發運昌代領其衆調防綏德時湘軍已剿金積堡運昌自清澗

至分所部略其西北毀長牆馬化隆勢蹙遣黨擾北山冀斷湘軍糧餉一自河西道葉昇堡屬劉松山一自山西道花定屬運昌並達靈州回旣陷定邊運昌所部多南人雜食青稞膏粱患腹病左宗棠調寶昌來援以河防不能赴是時陝回陳林禹彥祿等十三營益以本地土回號稱十餘萬卓勝軍孤立其間幾無日不戰明年正月軍益飢疲至殺馬爲食回且決渠灌我壘會風濤大作運昌晝夜立水中激厲將士列楫囊土禦之回不得逞適劉錦棠等越渠橫出回大潰因議夾河築壘護饒道兩日壘成回至運昌戰卻之湘軍開溝築隄以防水運昌壁近棗園冰忽解回迺悉秦渠設卡運昌越渠擊之回收入堡越二日堡回悉衆出騎寇越板橋步寇決渠水南下運昌軍阻水錦棠分三路泅水與合并力轟潰其衆未幾回復運甄石築卡於北環以長隄欲引馬連水以困我運昌亟令軍士攜鉏鍤夷其卡而還四月陳林率衆出花定掠食運昌使提督王鳳鳴禦之敗之甄井鎮同時葉昇堡道亦通軍威復振七月克馬家兩寨值新麥熟運昌與錦棠分刈並糜粟割之回來爭輒敗走遂築壘蔡家橋橋跨秦



渠內設卡外障水馬化隆前所爲阻遏官軍者也至是決水反灌破壘三十有一乘勢下秦壩關逼東關議掘濠築塹久困之與錦棠分段興工三日畢迺事遣兵分守之遂合金積圍日略血數次戰不少休陳林降運昌以西林河州未下宜稍示寬大强者編籍弱者就糧羣回多乞款馬化隆勢蹙亦束首歸命於是甯靈悉定論功賞黃馬褂駐纒金平甘回馬勝福亂晉頭品服徙駐包頭數請於宗棠愿西征光緒二年宗棠請敕准勇出關助剿報可明年夏行抵烏魯木齊命署提督越二年實授口外經喪亂後戶口減耗運昌興水利課農桑建橋梁皆割俸自任之其斥巨款賑畿苗實秉義母郭曹氏命李鴻章爲請於朝特建坊旌異之十一年謝病歸逾年卒卹如制入祀卓勝軍昭忠祠妾王氏馬氏張氏先後仰藥殉節皆獲旌

黃萬鵬字搏九湖南甯鄉人本籍善化初從曾國荃援贛皖積助至都司從克江甯歷遷總兵賜號力勇巴圖魯捻入鄂犯德安萬鵬馳救大敗之又破之安陸會師新洲於是夾擊大破虜擄提督左宗棠西征調赴陝署漢中鎮總兵同

治十一年從攻西甯抵碾伯戰硤口回潰走圍解明年從劉錦棠克向陽堡進圍大通降之選降衆立旌善五旗馬隊屬萬鵬領之隨攻肅州事甯賜頭品服十三年河州閃殿臣復叛萬鵬率崔偉等進擊敗之城南二十里鋪寇竄買家集官軍攻弗克萬鵬從姚家嶺馳下合攻燔其堡更勇號爲伯奇光緒二年出關時土回馬明據古牧白彥虎聞官軍至自紅廟子與合師夜襲黃田旦日聞古牧角聲起萬鵬與余虎恩馳擊寇騎卻之語詳余虎恩傳烏魯木齊諸城旣復追至池墩而還捷入賞黃馬褂北路略定逸寇多亡匿東南山谷萬鵬復與虎恩取道大小鹽池墩至柴窩略有斬禽八月金順攻瑪納斯南城弗勝錦棠檄萬鵬助擊掘隧以攻寇死拒矢貫萬鵬臂拔之更疾戰與諸軍大破之三年攻克達坂乘勝取托克遜至小草湖遇伏圍萬鵬數匝萬鵬率隊盪決所向披靡錦棠軍繼至寇大潰詔予雲騎尉世職是役帕夏知不免飲藥死彥虎遂奔開都河西岸七月師至曲惠錦棠自向開都河而令萬鵬道烏沙塔拉傍博斯騰淖爾西行出庫爾勒之背彥虎懾軍威已先期遁訶知脅纔回走布告爾亟

行四百里追及之戰良久大敗其衆九月馳抵托和奈再敗之收庫車進駐拜城履冰夜行至銅廠諸軍直搏之寇愕走萬鵬長驅察爾齊克臺西斬數千級越二日夜抵扎木臺稍憩卽引兵阿克蘇城未至城數里見西南塵埃起會探報彥虎走烏什噤安集延走葉爾羌絳追師錦棠迺舍安夷而令萬鵬專追彥虎阻河漲不能濟時彥虎止隔河十里許造飯掩襲可禽也而我師遽返錦棠大怒責令復進於是萬鵬渡胡馬納克河行戈壁八十里獲其後隊馬有才進拔烏什而彥虎已走喀什矣東四城俱下詔改騎都尉世職當是時伯克胡里據喀什攻漢城彥虎至助之勢益張守備何步雲告急錦棠檄萬鵬道布魯特與虎恩期會喀城萬鵬倍道應赴緣雪山千餘里每以氈鋪地濟師十一月抵城北麻古木虎恩亦抵城東牌素特寇調騎馳歸曰大軍至矣於是二巨酋走回城北進擣之則又宵遁萬鵬向西北追彥虎至爰及槽與賊後隊遇生擒僞元帥馬元斬其副白彥龍次日追至恰哈瑪納爲布魯特人所阻彥虎遂奔俄新疆平改授二等輕車都尉四年凱旋乞歸省越二年仍赴新疆治軍南北

山邊防救平晉頭品秩歷權喀什回城協副將阿克蘇巴里坤各鎮總兵新疆提督又襲其叔登和世職併爲二等男爵二十四年徵入京創發卒於道予建祠子鉞道員襲爵

余虎恩湖南平江人少孤貧喜讀書初從曾國藩討粵寇積勛至副將同治初從劉松山征捻燧之沙海西擢總兵賜號精勇巴圖魯張總愚與回匪合攻破金渠銀渠又敗之耶縣晉提督寇自宜川渡河陷山西州縣又從劉軍追復之易勇號奇車博軍獲鹿適郭松林被圍虎恩銳身馳救圍解繞道長驅騎寇雖森騁遇戰輒披靡上念陝事棘命左宗棠舉將才迺薦松山部將尤異者十數人虎恩與焉寵以頭品服令赴陝軍靈州既克松山進兵板橋蔡家橋有頃回敗走虎恩騎旅突之驟若風雨回不得歸下其村寨三十餘金積平假歸十一年命募軍赴甘劉錦棠攻西甯虎恩率軍至陝口周覽形勢寇出拒被困卒擊卻之錦棠覘回勢盛赴平戎驛造橋濟湟自督師築壘北岸令虎恩築南岸未成馬營灣寇突至虎恩轟擊之錦棠亦敗湟北寇於是西甯告甯論功賞黃馬

掛隨攻肅州軍南門與諸將討平之除陝安鎮總兵光緒二年從出關宗棠慮  
戈壁糧餉艱岫虎恩請身任之迺絕幕而西抵哈密取餘糧踰天山遞送巴里  
坤古城邊既實襲黃田破其卡忽古牧寇壓師而陣虎恩亟自山馳下與寇騎  
戰良久會董福祥軍助擊中路寇大潰遂合圍帕夏遣悍黨來援虎恩率騎旅  
列山岡嚴陣以待復麾軍截其歸路斬關直入城拔度烏垣寇且他遁以次下  
烏魯木齊迪化及僞王城予雲騎尉世職明年踰嶺而南從錦棠趨柴窩去達  
坂二十里夜初鼓虎恩率騎旅九營銜枚疾走大通哈引湖水衛城泥深及胫  
虎恩所部掠淖進依山爲陣斬寇謀士餘騎回方臥未覺也平旦始大驚悉衆  
出據險轟拒師屹立不動海古拉援至虎恩又截之隘口援騎返奔追逐數里  
斬百餘級虎恩策城回盼援不至必遁預隱兵以待寇出悉就禽達坂復乘勢  
下托克遜予騎都尉世職踰月規南路師次曲惠虎恩取道烏沙塔拉入庫爾  
勒城地閒無人食且盡乃掘窖糧數萬石濟師遂與諸將下庫車凡六日馳九  
百里已而喀什噶爾告急錦棠令虎恩自巴爾楚取中路爲正兵黃萬鵬自烏

什道布魯特爲奇兵仍歸虎恩節度師抵巴爾楚會天寒冰雪凝冽而喀城警報且日至迺兼程應赴軍士人人自奮各以俘白曾取首功爲利日中虎恩至城東牌素特夜半時抵喀什漢城下左右止百餘騎從迺整兵以俟平明步兵至寇騎開城出盪虎恩率衆大戰刺殺回曾王元林會萬鵬亦至復其城虎恩西追伯克胡里令桂錫植率騎旅自閒道疾馳而自率步旅繼之前後夾擊生禽余小虎馬元於陣繼復獲金相印父子相印者引安集延侵占南路也於是新疆南路平降救褒嘉改予一等輕車都尉歷駐烏什葉爾羌和闐赴本官十一年謝病歸越六年出統湘軍駐岳州以能捕盜名併二世職爲二等男爵二十六年授喀什噶爾提督未上留統武衛中軍十營拳亂起諸將多崇奉之獨虎恩則否福祥攻使館虎恩與論事榮祿前謂徧觀諸軍實不足敵外人福祥大怒欲殺虎恩榮祿以身翼蔽之迺免令出防獲鹿未幾仍還湘三十一年創發卒於家卹如制附祀宗棠松山祠

桂錫植山東曲阜人從軍討捻數遷至游擊咸豐十一年張總愚領餘衆與陳

大喜合勢張甚錫楨追至河間裏創力戰寇大敗錫楨名始著同治七年從左宗棠征陝回數獲勝檄守同官明年提督高連陞屯宜君親兵丁玉龍匪首也構回爲亂夜圍營帳戕統帥錫楨聞警亟自同官馳援擊却之復追剿金鎖關米子窩會楚軍將丁賢發等至拘玉龍誅之城獲全遷參將從克固原三營斬其酋楊文治進阬中衛四百戶回曾馬光明自固原東北入同心城復大敗之又降元城回海生春十年規河州錫楨自中衛靖遠南搜會甯游匪亡何肅州降回叛甘涼戒嚴錫楨遂還軍肅州明年略東關克其大卡一寇出拒擊退之先是肅回敗倚朱家堡黃草壩塔爾灣文殊山各堡互犄角誓死守徐占彪攻弗克至是誘之出錫楨隱卒深林俟寇過半橫截而出諸軍繼之寇大潰肅州西南墩堡悉平進屯沙子壩去肅城三里肅回啟南門出盪錫楨率騎旅突陣回奔入城諸軍衝殺連克四壩十一堡東面寇壘亦盡賜號精勇巴圖魯十二年從出關錫楨率四百騎歸額爾慶額節度進古城光緒二年攻阜康宗棠慮寇北竄令錫柏阨沙山馬橋備要擊尋會諸軍復烏魯木齊北路略定唯瑪納

斯南城久未下宗棠以劉錦棠軍單檄錫柏助擊與諸軍轟潰之斬其酋韓金農更勇號業普肯擢總兵進規南路三年從錦棠攻克達坂乘勝復吐魯番晉提督規喀什噶爾錫柏統馬步二千餘人自阿克蘇取道巴爾楚克瑪納巴什直抵喀城東牌素特會黃萬鵬軍亦至麻古木彥虎與伯克胡里潰逃遂復西四城論功賞黃馬褂回疆告甯晉頭品秩加賜呢絨額勇號五年乞歸葬親道陝創發險歲卒宣統改元巡撫恩壽狀其績以上予優卹

方友升湖南長沙人咸豐末從軍剿川寇積助至守備克太平力戰殲彈洞脇繇是以饒勇名同治七年討陝回克鳳翔岐山嘗從行有所衝陷入關隴隸劉松山麾下金積堡之役師失利會友升購馬張家口速歸無收馬者或勸之去弗聽驅馬數千入左宗棠軍宗棠大器之迺編所購馬爲西征靖營隊屬領之遣赴河州攻剿三甲集太子寺十一年會攻肅州其關城阻濠濠深三四丈古所謂酒泉也徐占彪乘回解踰濠進攻友升先登諸軍蟻附上奪東關回入城死守占彪築城南二卡回來爭友升率騎旅下馬巷戰彈貫脛及脊骨創甚猶



大呼殺賊水漿不入者七日衆咸奮克之捷入晉副將賜號哈豐阿巴圖魯十三年從克巴燕戎格署鎮夷營游擊自是別爲一軍幟色黃每戰從後擊殺富者輒靡寇見黃旗隊輒相戒無犯云光緒改元關隴平擢總兵從劉錦棠出關三年攻克達坂托克遜進復吐魯番晉提督以次下阿克蘇烏什庫車及天山南北二路論功賞黃馬褂賜頭品秩五年安集延布魯特寇邊徑抵烏魯克恰提友升先進烏帕爾覘虛實越數日報寇騎已入烏帕拉特獲寇謀訊知其乘夜襲營諸軍備往擊大破之友升與楊金龍分左右入軍士皆奮迅超躍寇不能成陣還遁俄羅斯八年入關遭母憂歸十年法越事起出頓懇祥進攻文淵陷重圍彈傷手斷筋親軍五百止存二十七騎卒潰圍出朝廷宥其敗且嘉勞之復諒山長慶予世職除廣東南韶連鎮總兵十三年入覲上視傷痕爲惻然尋解任中日失和領三千人北上守山海關拳亂作復率師入衛駐山西固關二十七年調浙江衢州鎮設講武堂以新法訓練其衆並修復柘水故道民德之三十二年創發卒卹如制

論曰初討陝回福祥以降軍効力名震西域何其悍也運昌統卓勝軍萬鵬領旌善營與虎恩錫植友升轉戰寧肅皆以驍勇名各著奇績其勇略亦有可傳焉其後福祥終以驕妄敗助亂斂釁竟免顯戮豈非倖歟